

'Sëédhe -blëesü 'ö Pɔdhö -ya bɔ Atanna -bha 'kɔdhigüme -nu 'wo

1 Tesadhonikö -pö 'gü -a -nu -dhe

-Tuabhonaɔ

1 ¹Me 'ka Atanna -bha 'kɔdhigüme -nu 'ka Tesadhonikö -pö 'gü, 'ö 'ka kwa Dë bha waa- kwa Dëme Yesu Klisi -bha zian -ta, mang Pɔdhö -me 'dhö, Sidhiven 'dhö, Timote 'dhö, yi -në 'yi 'sëédhe ya- bɔ ka -dhe. Yi -bhea -dhe kö -yö ka gba ö -bha -gasite waa- zuëwaanüsü 'ka.

²'Yi bhea" sië Atanna -dhe, yi -zu 'yaa bhɔ ka 'ka tongtongdhö. Yi- nue" -bho ka -wɔn 'gü yi -gban "pepe 'ka. ³'Dhang -bho "dhiü -sü 'ö ka -gɔ 'ö 'ka- 'gü -yë kë sië- -dhe -kpeawo bha yi -zu 'yaa bhɔ- 'ka. Yi- 'wɔn -dɔ -dhe Atanna -dhɔ -yö ka -kë -kɔ -gban -kɔ -gban 'gü, yö -në- -wɔn 'gü, 'yö 'ka sëë bho sië- -dhe "dhü bha, yi- 'wɔn -dɔ kwa Dë Atanna wëédhö -dhe kwa Dëme Yesu Klisi -dhɔ -yö ka -kë "pepɛdhö 'pö, -dhe ka "yan -ya nu -sü -gɔ 'kpakpadhö. Yö -në- -wɔn 'gü, 'yö yi -zu 'yaa bhɔ ka -wɔn 'ka, 'yö 'yi Atanna nue" bho ka -wɔn 'gü -kpeawo. ⁴Yi 'dhang -bho "dhiü, yi dheebhang -nu, -dhe Atanna yöö -dede -në ka -dhɔ -ya -kë 'yö ka sü 'ö ka -ya ö -bha -ya 'gü. ⁵-A 'klɔɔ- -mü -dhe -a -bha 'wɔn -taɔng -së 'yi- pö ka -dhe bha 'yii- pö yi "dhi "wɛwɛɛ. "Kɛɛ -a -bha 'Nii- -dede -yö yi -ta -kun, 'ö 'yi- -dhiang zë ka -dhe faan 'ö go Atanna yöö -dede -a 'gü bha- 'ka, kö yi 'dhang bho -sü -ya "dhiü 'kpakpadhö 'pö -dhe 'wɔn 'yi- pö sië ka -dhe bha 'yaa -sua 'ka. Gun 'yi- wo ka kpö 'gü mü bha, -tosea kë -kɔ 'yi- -kë 'ka, kë "dhü kö- -trɔɔn 'yö kë ka -bha kaa -dede ka- -dɔ. ⁶Yö -në- -wɔn 'gü, 'yö "ta -kɔ 'ka- -dhe yö yi -gɔ, 'ö kwa Dëme 'ta -kɔ 'ka bha, 'yö 'ka- wo sië bha. Yö -në- -wɔn 'gü 'zü, 'yö ka -bha 'dhang -bho Atanna -wu "dhiü -sü

kö -wo ka -wëë -kë "dhiü bho sië bha- =gban waa- -bha -bha, 'yö 'ka- -wu kun =niidadhe -dede 'ö go -a -bha 'Nii- 'slüüslü 'gü -a 'ka. 7Yö =në- -wɔn 'gü 'pö, 'yö mɛ "pɛpɛ 'wo 'dhang -bho kwa Dëmɛ "dhiü -mɛ 'ka -dɛɛ ka -bha Maseduanö -sɛ bha waa- Akai -sɛ -nu 'gü, 'wo ka =në ka -gen -ga sië, 'yö 'wo 'ta -kɔ sü ka -bha -bha bha. 8-A pö 'a- wo "dhü bha- -gen -mü =dhe kwa Dëmɛ -bha naɔ -së bha 'mɛ 'ka bha =në 'ka- sa, 'yö Maseduanö -mɛ -nu -wa =sɔɔ waa- Akai -mɛ -nu 'dhö, "kɛɛ 'yii 'to -zian wo- 'dhe 'kö bha yöö do- bha. Ka -bha 'dhang -bho Atanna "dhiü -sü -dede bha =në- -taɔng -yö =mɔɔ -dhe =gban "pɛpɛ 'gü, 'yö- -dhiang zë -kɔ 'bha -zian 'yaa 'dhö yi -gɔ 'zü. 9-10-A -gen -mü =dhe -kɔ -ya yi -dɛng -bha -kɔ 'ka- -ya 'ka kö 'ya nu ka -gɔ "sɛ 'gü mü bha waa- -kɔ 'ka 'dhang bho- 'ka Atanna "dhiü, 'ö 'ka ka -taa zun- 'ka -dhɔkɛpɛ =gban "pɛpɛ suu -gɔ 'ö 'ka Atanna "yaandhe =dede 'ö- -wɔn 'yaa =sua 'ka -a -dhɔkɛ, -kɔ 'ka -ya -sü 'ka- 'ka -a Gbö 'ö- bho ga 'gü, 'ö -ya 'dho dhang- 'gü 'ö nu sië, Yesu 'ö kwa dha- -bha -mawɔnsiödhe 'ö nu sië -dhekpaɔ dhia" 'gü -a -gɔ bha- nu -sü -gɔ =niida 'ka bha mɛ =gban "pɛpɛ -wa -dhiang -zë.

Dhiang zë -kɔ -blɛɛsü 'ö Pɔdhö -ya -kë

Tesadhonikö -pö 'gü -a -dhiang 'ö- zë

2 ¹N dheebhang -nu, kaa =dede ka- 'wɔn -dɔ =dhe nu 'yi- wo ka -gɔ 'plöö mü bha, 'yii kë 'wɔn 'gü "klɔng 'ka. ²'Ö gun kö yi -tun Fidhipö -pö 'gü kö 'yii -loo -kô ka -gɔ mü, -wo kë -gbaɔn yi ta 'ö 'wo yi -wëë -kë "dhiü =gban "pɛpɛ suu wo, "kɛɛ yö -zë =gban 'gü, Atanna 'yi- -bha zian -ta bha -yö kë yi -zɔ -gban 'ö 'yi nu- -bha naɔ -së bha- dɔ ka -gɔ, "kɛɛ 'sa kö yi -gblü bha- 'gü "dhü ka -gɔ mü 'pö. ³-A -gen -mü =dhe dhiang 'yi nu- zë ka -dhe bha tean- -dhiang -mü. 'Yii- -zë ka -dhe zian -dɛng ka -gɔ -dhɔ -bha, "ɛɛn "bhluubhludhe 'yaa gun yi -kɔ "piü, kö yöö 'to mɛ -zian kë -sü =në- -bha. 'Yii- -dhe mɔɔ- kö 'yi sɛɛ" 'kpɔ ka -dhe "yigblü -ta. ⁴"Kɛɛ 'wɔn "pɛpɛ 'yi- -dhiang zë bha, 'wɔn 'ö -dhi Atanna yöö =dede =në- -dhe yö -mü. -A -gen -mü =dhe -yö -dhi yöö =dede bha =në- -dhe, 'yö- dɔ yi -kɔ 'ka kö 'yi- pö mɛ "bhü- -nu -dhe. Yö =në- -wɔn 'gü, 'yö 'yi- -dhiang zë sië, 'yö 'yaa- zë -kɔdɔ "piü 'ka, -a -gen -mü =dhe 'yii- zë kö yi "dhia -yö 'ma mɛ "bhü- -nu -zë 'gü, "kɛɛ yi -zë kö yi "dhia- ma Atanna =në- 'gü. -A -gen -mü =dhe yö =në -dhe -yö yi zuë" 'piü. ⁵Kaa =dede ka- 'wɔn -dɔ 'kpakpadhö =dhe nu 'yi- wo mü bha 'yii "kpɛnng- -kë mɛ -gɔ -dhiang zë mɛ 'bha -dhe, "ɛɛn yi -nu mü -sü -gen 'yii -gban =naɔ mɔɔ- -sü -bha, Atanna =në yi "sɛɛ 'ka. ⁶'Yii- -dhe mɔɔ- kö -yö -kë ka 'ka oo, "ɛɛn -yö -kë mɛ "wɛɛ 'bha -zian =në- 'ka oo, kö -yö "dhe -ya yi -ta, "kɛɛ 'sa kö yi -mɔɔ -bha 'nu 'yi mɛdhe -faan -wɔ ka -ta kö 'ka yi =bhlëë -ya; -a -gen -mü =dhe Klisi -bha bɔmɛ -mü yi 'ka. ⁷"Kɛɛ yö =në =gban 'gü, 'yii "wɔ- -bha kö 'yi- kë "dhü. Yi -zɔn ka -dhe 'ö 'yi -tosɛa -kë ka "piü "yɛɛdhö =dhe -kɔ 'ö 'në "blë -dee dhe -yö -kë 'ka ö -bha 'në "piü bha- 'dhö. ⁸Ka -dhɔ -bha yi kë -kɔ yaa 'gü yaa bha- -wɔn 'gü, 'yii kë yi "piü

-dhe naɔ -së 'ö go Atanna 'piü bha 'yi yöö do- pö ka -dhe, "kɛɛ 'ya- wu bha- pö ka -dhe 'yi yi -du -bha -tosea -nu -ɟban "kplɛng -bho ka -dhe, ka -wɔn 'ö -kë yi -gɔ 'gbu- 'ö -ziö -naa 'gü bha- -wɔn 'gü. ⁹N dheebhang -nu, kaa =dede ka- 'wɔn -dɔ -dhe gun 'yi- wo ka 'piü mü bha yi yii- -kɔdhiü -yë -nu -kë 'ö 'yi yi -mawɔn -kë 'gü, 'ö 'yi sëë bho "binma -dhekpaɔ, kë "dhü kö 'ya 'dho kë -kwɛɛ- 'gbiin- 'ka me 'bha ka -ta. Atanna -wu -në 'yi- pö ka -dhe doseng. ¹⁰Atanna -yö yi "sɛɛ- 'ka, 'ö kaa =dede 'ka yi "sɛɛ- 'ka 'pö =dhe me "pɛpɛ 'ka 'dhang -bho "dhiü -mɛ 'ka Tesadhonikö -pö 'gü, yi -tosea -kë ka "piü "puu 'ka -a dhɔɔbhaa 'ka, 'ö me 'bha 'yii =sɔng yö yi -bha. ¹¹Ka- 'wɔn -dɔ 'pö =dhe gun 'yi- wo mü bha yi ka -wɔn -kun 'do 'do 'ka 'ö 'yi -kë ka -gɔ =dhe -kɔ 'ö 'në dë -yö -kë 'ka 'në -gɔ -a 'dhö. ¹²'Ö 'yi ka faan dɔ, 'ö 'yi kpa ka -zɔ -ta, 'ö 'yi -dhio dɔ ka -ta glɔglɔdhö kë "dhü kö ka 'ta -kɔ -yö dhi Atanna -dhe; -a -gen -mü -dhe yö 'ö bha =në ka -dhe sië -tosea -kë 'tɔbhɔdhe 'gü -sü 'ka 'ö -gɔ -gblüdüdhɛpö 'gü.

¹³Yö =në- -wɔn 'gü 'yö yi 'gü 'yaa ga- nue" bho -sü 'ka, -a -gen -mü -dhe -a -wu 'yi- pö ka -dhe 'ö 'ka 'dhang bho- "dhiü bha, 'kii- -ga =dhe me "bhu- -nu 'gü -dhiang 'wo- zë -kpaɔdhe -bha "wɛɛwɛɛ -a 'dhö, "kɛɛ ka- -sü =dhe -kɔ 'ö- 'ka =dedewo tɛan- 'ka Atanna -wu 'ka bha =në- 'dhö. Yö =në- -wɔn 'gü 'yö yë kë sië ka 'gü, 'yö =ya 'me 'ka 'dhang bho -a "dhiü ka "gla =dɛɛ bha. ¹⁴-A -gen -mü -dhe ka 'ö 'ka bha, n dheebhang -nu, ka =dhe Atanna -bha 'kɔdhigüme -nu 'ö =wa bɔ Yesu Klisi 'ka, 'wo Zude -sɛ 'gü bha =në- -nu 'dhö =dɛɛ. -A -gen -mü -dhe 'wɔn do 'ö- -nu dheebhang Zuifö -nu 'wo- -wɔ -nu -ta Atanna -wu -wɔn 'gü bha =në ka -gɔ "sɛgüme -nu 'wo- -wɔ 'pö ka -ta. ¹⁵'Mɛ 'wo bha =në 'wo kwa Dɛmɛ Yesu zë, wo =në 'wo Atanna -wudhiüloome -nu zë, 'wo =në 'wo yi -wëë -kë "dhiü =ɟban "pɛpɛ suu wo. Wo -zë -wo mɛ =ɟban "pɛpɛ =në- 'yaa- 'ka. Yö =në- -wɔn 'gü 'yö- -nu -dho 'yaa Atanna kë. ¹⁶Wo =në 'wo zun -sü 'ka yi -gɔ zian-. 'Yaa- -nu "piü -dhe 'yi Atanna -wu pö 'me 'waa Zuifö 'ka- -nu -dhe kö -wo dha. -Wo woo 'wɔn yaa -ta =në pa sië do Atanna wëëdhö 'wo dho- 'ka. "Kɛɛ =ya 'ö bhlɔɔ bho- -nu -gɔ =ɟban wo =ya bo.

**Pɔdhö -bha -fië -dho Tesadhonikö -sü -bha -sü kö
-yö Timote bɔ waa- yee kë -sü -dhiang 'ö- zë**

¹⁷Yi -zë yi -bha 'ka, n dheebhang -nu, kwa 'yan -go 'kwëë- -yi 'yaa =dɛɛ, 'kwaa -dhe do 'gü -a yi =ya =gwëë, "kɛɛ ka -dho -zë -yö yi zuë" 'piü -kpaɛwo. -A "sɪ =në 'yaa yi -dhe, "kɛɛ "yan -kpan ka -bha -dho "kakasü -yö yi -bha. ¹⁸'Ya- "slë mɔɔ- -kɔ =ɟban -kɔ =ɟban 'gü kö 'yi nu mü, "kɛɛ mang Pɔdhö -mɛ -zë -yö n "piü 'nu -zianwo =dhe 'a nu -kɔ do 'ɛɛn =plɛ -zian kë 'nu -deewo ka "piü mü, "kɛɛ yi -kɔ =në 'yii -mɔɔ- -bha. -A -gen -mü -dhe Sɔtraan =ya zun yi -gɔ zian-. ¹⁹'ɛɛn -yö ka 'gü =dhe yi -zɔ -yö -më -wɔn "wɛɛ 'bha =në- 'gü, 'ö yi =nii -da -wɔn 'ka, "ɛɛn 'ö yi 'tɔ bhɔ -wɔn 'ka kwa Dɛmɛ Yesu nu -yi 'ka kö 'yii kë ka -zë ka 'ka? ²⁰Ka =në 'ka yii- 'tɔbhɔdhe waa- yii- -niidadhe =ɟban 'ka.

3 ¹Yö =në- -wɔn 'gü 'yö =dhe 'yi- ga -dhe 'ya- "slë mɔɔ- 'ya =fië- -bha, "kɛɛ 'ö ka -dho -kun yi -bha -sü 'sɪ 'yaa yi -dhe 'zü, 'yö -dhi yi -dhe kö me =ple 'yi 'to Atenö yö, ²kö 'yi kwa dheebhang Timote 'ö yeng- -nu 'yi Atanna -bha yë bha- kē sië bha yö -zë bɔ, kö =ya nu kö -yö ka faan dɔ, kö ka 'gü 'ya 'dho ga -zu -yö Atanna -dhe -sü 'ka. -A -gen -mü =dhe yi 'dhang bho- "dhiü =dhe Atanna =në- -ya kö -yö kwa Dëme Klisi -bha naɔ -së bha-dɔ. ³Yi- -bɔ "dhü kē "dhü kö -din yën 'ya 'dho 'ma ka -bha saan" 'kwa- wo sië Atanna -wu -wɔn 'gü bha- -wɔn 'gü. -A -gen -mü =dhe -a 'wɔn- kaa =dede ka "yaan =dhe saan" 'dhe 'kö bha 'yaa 'kpɔ 'dhang -bho -a "dhiü -me 'bha 'ka tongtongdhö. ⁴Ka- 'wɔn -dɔ =dhe "tüng 'yi gun- 'ka ka "piü mü bha, 'yii 'wɔn bha- 'bha -bin ka -gɔ. 'Yi- -to "dhiü 'yi- pö ka -dhe =dhe 'wɔn- -dho =gbaɔn kwa -ta, 'ö 'kwa sëë bho =dhe -kɔ =dede 'ö kē sië- 'ka bha- 'dhö. ⁵Wɔn 'ö- -wɔn 'gü, 'yö n -zu -yö dun 'yö 'a Timote bɔ kö -yö nu -wo ka -bha kö -naa 'ö ka -bha -zu -yö Atanna -dhe -sü 'dhö- -ta 'a- dɔ bha 'yö bha. -A -gen -mü =dhe kē "dhü 'ö Sɔtraan -yö "kpëngg- -kē ka -gɔ 'ö ka -pö, 'ö yë "sinma 'yi- -kē ka -gɔ mü bha 'ö -kē saan" -sü "fië 'ka 'ö- =trɔɔn 'yaa kē.

⁶"Kɛɛ =dhe 'ö Timote =ya 'go mü =ya nu =ya =loo yö, 'ö =ya ka -dhiang zë yi -dhe, 'ö 'wɔn 'ö -gban ka -bha 'dhang -bho Yesu "dhiü -sü waa- -dho 'ö ka 'gü -bha bha =ya ziö- yi -dhe -a -gen 'gü, 'ö =yaa- pö 'zü yi -dhe =dhe kaa -dɪ 'pö yi -dho =ya ka 'kun =dhe -kɔ 'ö ka -dho -yö yi kun- 'ka -a 'dhö, 'yö yi zuë" -yö 'waanu. ⁷Ka -bha -zu -yö Atanna -dhe -sü bha =në- -wɔn 'gü, n dheebhang -nu, 'yö sëëbhodhe -nu 'ö yi -bha waa- zuëdhiütɛɛ -nu 'ö yi -bha -a -gbaan "gla yi -gɔ =niidadhe 'gü, 'yö yi faan =në dɔ sië =taamasü ya- 'gü do 'ö dho- 'ka. ⁸-A -gen -mü =dhe -a ma 'yi- wo =dhe ka -kplü -sü 'ka kwa Dëme bha- -bha kpëngkpëngdhö bha =ya yi gba faan -dee 'ka, 'ya kē =dhe "yua -kɔ =ya gun =ya ziö 'mɛ 'ö- -gɔ "kɛɛ 'ö =ya dha- -gɔ -a 'dhö. ⁹'Ya yi -zu 'gɔn, Atanna nuɛ" bho -kɔ -zian 'yi dho- bho- 'ka ka -wɔn 'gü kö -yö yi -zu 'kun 'yaa- -kɔ yö 'zü. -A -gen -mü =dhe yi zuë" -nii 'ö -da sië ka -taɔng 'yi- ma bha- -wɔn 'gü kwa -bha Atanna bha- wëëdhö bha, -a -dhiang zë -kɔ -zian 'yaa yi "yaan. ¹⁰'Ya "wlü 'yëngg- 'gü "ɛɛn gbeng 'gü, "tüng "ɔɔ "tüng 'ö 'yi bhea" -zë wo sië- 'ka Atanna -dhe, yi yi -kɔ "puu -kpɔ -dhe, 'ö yi =nëng 'gü dɔɔndɔɔndhö kö -yö zian "pu yi -gɔ kö 'yi nu 'yi yi "yan -kpan ka -bha, 'ö 'yi -bhëa- -dhe kö -yö ka -ta 'kun 'zü -kɔ =gban -kɔ =gban 'gü kö pë 'dhe 'ö- -wɔn =ya 'to ka -gɔ "tüng ya- 'gü ka -bha 'dhang -bho -a "dhiü -sü 'gü kö -yö =mɔɔ "kwëë bha, kö -ya nu ka -dhe.

¹¹Yi -bhëa -dhe kö yöö =dede 'ö kwa Dë 'ka bha waa- kwa Dëme Yesu -wo zian bho yi -gɔ kö 'yi -wo ka -dhe 'gü. ¹²Yi -bhëa -dhe kö ka 'ko -nu -dho 'ö ka 'gü, 'ö dho 'ö -wɔ 'ka me "pɛpɛ =gban -dho -bha ka kē -sü -ta bha -ya 'bha -da 'gü -kpeawo kö -yö sa, kö -yö =mɔɔ -dhe =gban 'gü -dhe -kɔ 'ö ka -dho -yö yi -kē 'ka 'pö bha- 'dhö. ¹³Kö -yö ka -zu -gban, kö pö 'ya 'dho kē ka -bha kwa Dë Atanna wëëdhö ka -ya 'ö- wo -dɪ -ta bha- 'gü 'wɔn 'bha -wɔn 'bha 'gü, yi 'ö kwa Dëme Yesu waa- -bha -yame -nu 'wo dho nu- 'ka bha- 'ka.

**"Ta -kɔ 'ö Atanna -zv -kun -a -dhiang 'ö Pɔdhö
-ya zë Tesadhonikö -mɛ -nu -dhe**

4 ¹Ya 'go yö -zë 'gü, n dheebhang -nu, -a 'dhe 'kö -gban 'ta -kɔ 'ö 'ka dho 'ta- 'ka kö ka 'dhia -yö 'ma Atanna 'gü -a -bha, 'ya ka -klang kë yö -zë 'ka 'nu, ka yö -zë kë sië, "kɛɛ 'pë 'yi- 'piü 'yi- pö ka -dhe dɔ 'kwa- wo ya- 'gü, yö mü -dhe kö 'ta -kɔ -së 'ka- kë sië bha- 'bha -në -yö -da 'gü kö -yö 'dho- 'ka -kpeawo. 'Wɔn 'yi bhea" sië ka -dhe -a 'gü 'ö 'yi- 'gü -gbɛʊʊ kë sië kwa Dème Yesu 'tɔ 'gü bha 'yö bha. ²-A -gen -mü -dhe -dhio -wu 'ö kwa Dème Yesu -ya -wɔ yi "dhi 'yi- dɔ ka -ta bha -yö ka "yaan. ³Yi- -pö ka -dhe -dhe 'pë 'ö Atanna 'gü -së, 'ö- -dhidhewɔn 'ka, yö -mü -dhe kö 'ka ka -dɔ 'kun -së, kö me 'bha 'ya 'dho pö yö ka -bha 'wɔn 'bha -wɔn 'bha 'gü, "kɛɛ kö 'ka ka -dɔ 'kun "kwɛɛkwɛɛ kë -sü -në- -gɔ. ⁴Yö -mü -dhe kö me 'ö "dhü -yaa- pö 'ö dhe 'sü, kö- 'sü -kɔ -yö kë -bhlëësü Atanna wëëdhö "ɛɛn me "bhu- -nu wëëdhö. ⁵kö 'ka 'dho ka -kɔ "kan ka -dɔ -wɔn "dhiü 'ö 'wɔn 'ö -gban "kwɛɛkwɛɛ kë -sü -bha bha- -kɔ -yö -ziö ka -gɔ -dhe 'me 'waa Atanna dɔ- -nu 'dhö. ⁶'Wɔn 'ö Atanna 'gü -së, yö -mü -dhe kö me 'bha 'ya 'dho kë -da -sɔng yaa suu bha- 'ka wo 'ko -gɔ 'kɔɔmɛ 'ka, 'ö- -mɛ -bha dhe bho- -gɔ -a -bha faandhe 'ka, "ɛɛn 'ö -ziö -keng-. 'Wɔn suu bha 'ya- -dhio dɔ ka -ta 'nu 'ya yi kɔngga ziö- 'ka ka -dhe "sɛɛ glɔglɔdhö. -A -gen -mü -dhe 'me 'wɔn suu bha- -kë kwa Dème -dho 'wɔn bho- 'gü. ⁷-A pö 'a- wo "dhü bha- 'klɔɔ- -mü -dhe Atanna 'yii kwa -dhe kö 'kwa -tosea kë -niësü -zë 'gü, "kɛɛ kö 'kwa kwaa- kwa kë -sɔng zizi -nu bha -në- 'zü kö 'kwa -ya -a -bha -ya 'gü. ⁸-A kë "dhü -sü bha- 'gü, me "ʊʊ me 'ö 'yii -dhio 'a- dɔ ka -ta bha- ma, kö 'yii -kɔ me "bhu- -zë -wu 'ka, kö Atanna 'ö 'ö -bha 'Nii- "slüüslü -gbɔɔ ka -gɔ bha -në- -mɛ -yö -kɔ -wu 'ka bha. ⁹-A 'dhe 'kö -gban ka 'ko -dho -bha 'ka 'kö kë -sü 'ö Atanna -bha zian -ta bha- -bha, -yö n 'gü -dhe yö -zë -pö ka -dhe -gen 'yaa 'dhö 'zü; -a -gen -mü -dhe yöö -dede -ya ka -klang kë yö -zë 'ka. ¹⁰-A pö 'a- wo "dhü bha- 'klɔɔ- -mü -dhe kwa dheebhang -nu 'wo 'dhang bho 'pö Yesu "dhiü -dhe kwa 'dhö, 'wo ka -bha Maseduanö -sɛ -gban "pɛpɛ 'gü -a -nu -dho -yö ka -kë. "Kɛɛ 'wɔn 'ö yi "piü -dhe 'yi- pö ka -dhe dɔ 'kwa- wo ya- 'gü, yö -mü -dhe kö -dho 'ö ka -gɔ bha- 'bha -në -yö -da 'gü kö -yö 'dho- 'ka "dhiü -kpeawo, n dheebhang -nu. ¹¹Kö 'ka ka 'gü dɔ "gbu- 'ka -tosea kë "yënnng -dhië 'gü, kö 'ka -ya ka -dɔ -gɔ -wɔn -nu -në- zuën -ta, kö 'ka ka -dɔ -bha yë kë kö 'ka ka -bhöpë -slɔɔ -dhe -kɔ 'yi- -dhio dɔ- 'ka ka -ta bha- 'dhö. ¹²Kë "dhü kö 'ka kë -bhlëësü 'me 'waa 'dhang bho Yesu "dhiü -a -nu 'gü, kö ka -kwɛɛ 'gbiin- 'ya 'dho me 'bha kë.

**'Wɔn 'ö -gban 'mɛ -wa ga -a -nu -bö -sü waa- kwa Dème nu -sü
-bha -a -dhiang 'ö Pɔdhö -ya zë Tesadhonikö -mɛ -nu -dhe**

¹³N dheebhang -nu, 'yaa yi "piü -dhe 'wɔn 'dhe 'ö -gban 'mɛ 'wo ga Atanna -bha zian -ta -a -nu -bö -wɔn -bha bha 'ka kë- 'gü ka tii -bha, kö

-wëë -yö bɔ ka -ta -dhe 'mɛ- -nu -zɔ 'gɔn -sü 'yaa 'wɔn 'bha -wɔn 'bha -dhe -dhekpɑɔ dhia" 'gü -a -nu 'dhö. ¹⁴-A -gen -mü -dhe -ya kɛ -dhe 'dhang -bho "dhiü -sü -zɛ -ya kɛ kwa -gɔ -dhe ga 'ö Yesu -ya wo bha -yö kɛ -bö, kɔ -ka -kwa 'dhang bho- "dhiü 'pö -dhe Atanna -dho bɔ Yesu -ta 'ö waa- 'mɛ 'wo to- -bha zian -ta 'wo ga bha- -nu -bö 'pö.

¹⁵-A 'klɔɔ- -mü -dhe -wɔ 'ö kwa Dɛmɛ -ya dɔ yi "dhi kö 'yi- pö ka -dhe -kaa -ga 'ö ya. -Ya -pö -dhe -a nu "tüng 'dhö dho -loo 'mɛ 'ö kwa -bha kö kwa -tun "yaandhe 'ka -a -bha zian -ta bha, kwa -zɛ 'kwii 'dho -da 'mɛ -wa ga 'nu -a -nu "dhiü kö 'kwa 'dho- "piü. ¹⁶"Kɛɛ kwa Dɛmɛ yöö -dede -a -bha -go dhang- 'gü -sü 'ka, Atanna -bha "kiɛ -nu -gɔmɛ do- -dho -a "kwikan 'ö 'kwa- ma, 'ö- -bha "truu -yö -wɔ 'ö 'kwa- ma, 'yö gun -na 'go dhang- 'gü 'ö -lɔɔ, 'yö 'mɛ 'wo to- -bha zian -ta 'wo ga bha 'wo -bö -kɔ -blɛɛsü. ¹⁷-Ya 'go mü 'yö 'mɛ 'kwa dho 'to "yaandhe 'ka waa 'mɛ 'wo -bö bha mɛ -gban 'kwa -tɔn kun kwa "kwëë, 'yö 'kwa dho dɔ kwa Dɛmɛ -gɔ zian- dha 'kpong- 'gü, 'yö 'kwa -kpan -bha 'tɛng- -ta, 'yö 'kwa gun -na -tosea kɛ -a "piü -todhü 'ka. ¹⁸-A -kɛ "dhü -sü bha- 'gü, -ka ka 'ko -nu -zɔ -gban -wɔ -nu bha -nɛ- 'ka.

5 ¹-A 'dhe 'kö -gban yi 'ö kwa Dɛmɛ dho nu- 'ka waa- -a "tüng -zɛ -bha, n dheebhang -nu, -yö n 'gü -dhe yö -zɛ -pö ka -dhe -gen -zian 'yaa 'dhö. ²-A -gen -mü -dhe ka yö -zɛ 'wɔn -dɔ 'kpakpadhö -dhe -a nu -sü -dho "kan -nɛ- wo mɛ -gban 'gü -dhe -kwaanmɛ -yö nu gbeng. ³"Tüng -dede 'ö mɛ "bhu- -nu 'wo-pö siɛ- 'ka -dhe: «Aa "sɛ -ya 'waanu, 'kwa -ya kwa -dɔ 'flɛɛ- 'gü bha -nɛ 'güseedhe dho "kan- -nu 'gü -a 'ka -dhe -kɔ 'ö 'nɛ 'kpɔ "gblüüdhepiü -yö zun- 'ka 'gbiödhe -nu -bha bha- 'dhö, 'yö 'waa dha- -gɔ tongtongdhö. ⁴"Kɛɛ ka -zɛ, n dheebhang -nu, 'kaa 'wɔn yaa 'gü kö yi 'ö bha -yö "kan ka 'gü -dhe -kwaanmɛ -yö -kan mɛ 'gü. ⁵Ka -zɛ ka -tosea -sɛ kɛ siɛ, kwa -zɛ 'wɔnyaakɛmɛ 'yaa -mü kwa 'ka 'zü. ⁶-A -kɛ "dhü -sü bha- 'gü, 'kwa 'dho yi zɛ -dhe mɛ -kpɛa 'dhö, -kwa -ya kwa "yaan kö 'kwa kwa -dɔ 'kun -sɛ. ⁷-A -gen -mü -dhe yi 'ö mɛ -ya zɛ bha -ya -zɛ gbeng -nɛ- 'gü, 'yö 'mɛ woo -dɔ 'pö 'wo we kpɔ wo -dɔ -gɔ bha 'wo- kpɔ gbeng. ⁸"Kɛɛ mɛ 'ö kwa -zɛ 'kwa -dhepuudhe 'gü -mɛ -nu 'ka bha, -ka -kwa kwa -dɔ 'kun -sɛ, kɔ -dho waa- -zɔ -yö Atanna -dhe -sü 'ö kwa -gɔ bha, 'kwa- -da kwa -bha -dhe -piö "bhɛɛ 'dhö, kɔ dha -sü kö 'kwa -tosea -sɛ kɛ Atanna "piü, 'ö kwa -zɔ 'dhö- 'gü bha -yö kɛ kwa -gɔ -dhe -piö gblaa- 'dhö kö 'kwa- -ya kwa -gɔ -bha. ⁹-A -gen -mü -dhe Atanna -yö kwa -da "dhü kö 'kwa dha -nɛ wo kwa Dɛmɛ Yesu Klisi 'saa- 'gü. 'Yii kwa -da kö 'ö 'wɔn -zɛ wɔ kwa -ta. ¹⁰-A 'klɔɔ- -mü -dhe Yesu Klisi bha -nɛ ga kwa -wɔn 'gü, kɛ "dhü kö -a nu "tüng -ya -loo kö kwa kwa "yaan oo, "ɛɛn kö 'kwa ga 'zü oo, kö 'kwa -tosea kɛ -a -yɛnng 'gü. ¹¹-Dhe 'ö "dhü, -ka ka 'ko -nu -zɔ -gban, kö 'ka ka 'ko -nu faan dɔ yi -gban 'ka -dhe -kɔ 'ka- kɛ siɛ- 'ka bha- 'dhö.

**-Dhio 'ö Pɔdhö waa- ö "tayɔɔ -nu 'wo- dɔ Tesadhonikò
-mɛ -nu -ta waa- -a -nu -tuabhonɔɔ -nu**

¹²Yi -bheɛ ka -dhe, n dheebhang -nu, kö 'mɛ 'wo Atanna -bha yɛ kɛ siɛ ka kpö 'gü, 'ö 'wo- -gleng -da siɛ ka -bha, 'ö 'wo ka "dhiü -ziö wo siɛ bha

'ka- -nu -ya -bhlëë 'gü, ¹³-kaa -nu -bhlëë -ya -dedewo kö- -nu -dho -yö ka kè yë -së 'wo- kè sië bha- -wön 'gü. -Ya 'go mü, (ka zuë" -yö kè ka 'ko "piü -sëa,) kö 'ka dhi ka 'ko -dhe -kpëawo.

¹⁴Yi -bhea 'zü ka -dhe, n dheebhang -nu, kö "wlaame -nu 'wo -tosea kè sië "bhluebhludhe 'gü ka kpö 'gü bha 'ka -ya -nu "yan 'gü kö 'ka ka -kö -ya 'me 'ö- -nu -din -ya yën bha- -nu zuë" -ta. Kö 'ka 'me 'sü 'yaa- -nu -dhe Atanna -bha zian -ta bha- -nu -ta 'kun, kö ka zuë" -yö kè -sëa me -gban "pëpe "piü. ¹⁵-Kaa kè -së kö me 'bha 'ya 'dho 'wön yaa 'yö bho 'ö "tëado -gö 'wön yaa 'ka, "këe -ka 'wön -së -në- kè -dhe mwo- yi -gban "pëpe 'ka ka 'ko -dhe, "ëen me -gban "pëpe -dhe.

¹⁶Ka -nii -yö -da yi -gban "pëpe 'ka. ¹⁷Kö ka 'gü 'ya 'dho ga -bhea Atanna -dhe -sü 'ka tongtongdhö, ¹⁸"ëen kö 'ka- nuë" bho 'wön -gban "pëpe suu 'gü, -a -gen -mü -dhe -ya "piü -dhe 'ka yö -në- kè "tüng -gban 'gü ka -bha -kè Yesu Klisi -bha 'ka -sü -wön 'gü!

¹⁹'Ka 'dho zian ta -a -bha 'Nii- 'ö ka 'gü bha- -gö 'ö ö bo -a -wön -peng -dö ka 'ka -sü 'ka. ²⁰Kë "dhü 'ö 'ka -ya -wu 'ö- dö ö -wudhiüloome "dhi bha- -san 'ka! ²¹"Këe -ka 'wön "pëpe bha- -gban -ga 'kpakpadhö -së 'ka, kö- 'dhe 'ö -së, 'ka- 'sü ka -bha 'ka. ²²-Ka ka -dü 'kun -së kö 'ka 'dho 'wön yaa suu "bu suu 'bha kè.

²³Atanna 'ö zuëwaanüsü nu me -dhe bha -yö bian bho ka -bha -kö -gban -kö -gban 'gü kö -yö ka "zu, kö ka -dhü -to "dhü -sü, ka 'nii- oo, ka -wü oo, -wo 'to "puu 'ka kö pö 'a 'dho kè- -bha kwa Dëme Yesu Klisi nu -yi bha- 'ka! ²⁴Atanna 'ö ka -dhe kö 'ka kè ö -bha 'ka bha -në dho- kè "dhü, -a -gen -mü -dhe yö -zë 'yaa "plüün 'gü "fië bho.

²⁵N dheebhang -nu, -ka bhea"- -dhe yi -wön 'gü 'pö.

²⁶-Ka kwa dheebhang -nu "pëpe 'wo Yesu -bha 'ka mü, -a -nu -gban "pëpe -tua bho yi -dhe 'gbe, kö 'ka -loo ka 'kwëë- -dhe dheebhang -zë -nu 'dhö.

²⁷A -bhea ka -dhe kwa Dëme 'tö 'gü kö 'ka dö "gbu- 'ka 'sëedhe ya- -wu pö kwa dheebhang -nu "pëpe 'wo ka -gö "së 'gü mü bha- -nu -dhe.

²⁸Kwa Dëme Yesu Klisi -bha -gasite bha -ya kè ka -dhe (yi -gban "pëpe 'ka)!